



De Kuala Cafe lambang kerjasama ECER dan UMP

Universiti Malaysia Pahang (UMP) dengan kerjasama Program Pembangunan Insan ECERDC-UMP yang memperkenalkan Program Latihan : Masakan 1 Malaysia telah berjaya merealisasikan satu kedai yang bertemakan masakan Melayu 1 Malaysia pada perasmian Pusat Transformasi Luar Bandar (RTC) di Pekan Pahang pada 1 Mac 2013 yang lalu.

Kerjasama pembukaan kedai ini yang dinamakan De' Kuala Café adalah hasil kerjasama strategik antara UMP dan ECER di bawah program ECER Mahkota Kuala Pahang yang telah dirasmikan oleh Tengku Mahkota Pahang pada tahun lalu.

Kedai hasil usaha sama pihak ECERDC bersama UMP ini telah membuat pembentangan idea De' Kuala Café kepada Kementerian Luar Bandar & Wilayah dan telah mendapat lampu hijau untuk beroperasi di salah satu bangunan RTC Kuala Pahang.

RTC, Pekan Pahang telah dirasmikan oleh Perdana Menteri Malaysia, Yang Amat Berhormat Dato' Sri Mohd Najib Tun Haji Abdul Razak.

Menurut Dato' Sri Najib, pembukaan RTC keempat selepas RTC Perak, RTC Kelantan dan RTC Melaka itu juga diyakini dapat menyalurkan pelbagai kemudahan di bawah satu bumbung yang akan memberi khidmat paling dekat dan terbaik kepada penduduk luar bandar dan sekitar.

Manakala menurut Nor Alisa Azam yang merupakan pemilik kedai De' Kuala Café, keyakinan beliau untuk mengikuti program kelas masakan hasil daripada bantuan UMP telah membantu beliau merealisasikan impian untuk mempunyai sebuah kedai yang menjual makanan Melayu.

"Saya amat berterima kasih kepada pihak UMP dan ECER kerana telah sudi membantu menaja peralatan kedai manakala ubah suai kedai disediakan oleh Kementerian Luar Bandar & Wilayah.

"Saya juga berasa gembira dan amat terharu dengan bantuan yang diberikan di samping berjanji akan berusaha dengan bersungguh-sungguh untuk memajukan kedai makanan itu", katanya. Nor Alisa bersama rakan-rakan adalah peserta Program Masakan 1 Malaysia di bawah kendalian UMP dengan kerjasama ECER.

Turut hadir Menteri Besar Pahang Yang Amat Berhormat Dato' Sri Diraja Haji Adnan Haji Yaakob, Menteri Kemajuan Luar Bandar dan Wilayah, Datuk Seri Mohd Shafie Apdal, Menteri Perdagangan Dalam Negeri Koperasi & Kepenggunaan, Yang Berhormat Dato' Sri Ismail Sabri Yaakob dan Ketua Setiausaha Negara, Datuk Seri Dr Ali Hamsa.

